

ଜିଉଦାଙ୍କ ପତ୍ର ଜିଉଦା ଲେକ୍‌ଲା ଚିଠି ଏ ବଇର୍ ବିସଇ ଜାନ୍‌ବାଟା

ଏ ଚିଠି ଲେକ୍‌ଲା ଲକର୍ ନାଉଁ ଇସାବେ ଏ ବଇର୍ ନାଉଁ ଦିଆଅଇଆଚେ । ଜିଉଦା ନିଜେ ଜାକୁବ୍ ଜିସୁର୍ ବାଇ ବଲି ଜାନାଇଅଇଲାନ୍ତି । ତେବର୍‌ପାଇ ତାକେ ଜିସୁର୍ ବାଇମନର୍ ବିତ୍‌ରେଅନି ଗଟେକ୍ ଲକ୍ ବଲି କଇବାଇ ୧ ପୁର୍ନା ନିୟମର୍ ବିସଇ ଉଦାର୍ କରିରଇଲାକେ ଏଟା ଗଟେକ୍ ନିକ୍ ମାଣ୍ଡୁଲିକେ ଲେକା ଅଇରଇଲା ପାରା ମନେ ଆଇସି । ଜିଉଦାର୍ ଚିଠି ସତ୍‌ରେ ପଢ଼ବା ଲକ୍‌ମନ୍ ଜିଉଦି ବଲି ଜାନାଇଅଇଲାଇନି । ଜନ୍ ଲକ୍‌ମନ୍ କି ବାବା ପର୍‌ମେସର୍‌ର ଆଲାଦେ କିରିସ୍‌ଟର୍ ପାଇ ସଙ୍ଗାଅଇଆଚଡ଼ । ଜାଇଟା ଅବେ, ଜିଉଦା ବାଚାଇଅଇରଇବା ସବୁ ଲକ୍‌ମନ୍‌କେ ନିଜର୍ ବିସଇରେ ଜାନାଇଲାନ୍ତି । ଏ ଚିଠି ଜିସୁକିରିସ୍‌ଟ ଜନମ୍ ଅଇକରି ପାକାପାକି ୬୦ ବିତ୍‌ରେ ଲେକାଅଇରଇଲା ।

ଜନ୍ ଲକ୍‌ମନ୍ ଟକାବଣ୍ଡା କର୍‌ବା ବିସ୍‌ବାସି ମନର୍ ବାଟେ ଜାଇତେରଇଲାଇ, ସେ ସବୁ ବିସ୍‌ବାସିମନ୍‌କେ ଜାଗ୍‌ରଡ଼ କରାଇବାକେ ଲେକାଅଇଆଚେ । ସେ ଦଦାପେଲା ଅଇକରି ପୁର୍ନା ନିୟମର୍ ବିସଇ ଆରି ଗଟିରଇବା ବିସଇ କଇଲାନ୍ତି । ଏ ଚିଠିତେଇ ମିର୍ ସିକାଉମନର୍ ବିରୁଦେ ପିତରର୍ ୨ ଯ୍ ଚିଠିତେଇ ବାବିକରି ଲେକା ଅଇଲାଟା ସଙ୍ଗ୍ ମିସିଆଚେ । ଇତି ଦୁଡ଼ ଆରି ସଦମ୍ ଗମ୍‌ରା ବିସଇ ମିସା ଲେକାଅଇଆଚେ ଜିଉଦା ୧:୪; ୨ ଯ୍ ପିତର୍ ୨:୧

ଏ ବଇ ବିତ୍‌ରେ ରଇଲାଟା

୧. ଜିଉଦା ପର୍‌ଡୁମ୍ ତାର୍ ଚିଠି ପଢ଼ବା ଲକ୍‌ମନ୍‌କେ ନିଜର୍ ବିସଇ ଜାନାଇଆଚେ । ୧:୧-୨
୨. ମିର୍ ସିକାଉମନର୍ ବିରୁଦେ ଜାଗ୍‌ରଡ଼ କରାଇଆଚେ । ୧:୩-୪
୩. ସେ ପୁର୍ନା ନିୟମର୍ ଲକ୍‌ମନ୍‌କେ ଆରି ଅଇରଇବା ଗର୍‌ନାକେ ଦେକାଇ କଇବା ବିସଇ । ୧:୫-୧୬

- ୪. ଜାକୁବ୍ ଜାଗରତ୍ କରାଇଲାଟା, ସେ ବିସଇ ସେମନର୍ ଦାଇତ୍ କେନ୍ତାର୍ ରଇବାର୍ ଆତେ ସେ ବିସଇ କଇଲାଆତେ ୧:୧୭-୨୩
- ୫. ସାରାସାରି ସେ ପରମେସର୍‌କେ ଡାକ୍‌ପୁଟା କରି ସେ ଲେକ୍‌ବାଟା ସାରାଇଆତେ । ୧:୨୪-୨୫

^୧ *ମୁଇ ଜିଉଦା । ଜିସୁ କିରିସ୍‌ଟର୍ ଗଟେକ୍ ଗତିଦାଙ୍ଗ୍‌ତା ଆରି ଜାକୁବର୍ ବାଇ । ଜନ୍ ଲକ୍‌ମନ୍‌କେ ପରମେସର୍ ବାଟ୍‌ଲାଆତେ, ସେମନର୍‌ପାଇ ମୁଇ ଏ ଚିଟି ଲେକ୍‌ଲିନି । ବାବା ପରମେସର୍ ତମ୍‌କେ ଆଲାଦ୍ କଲାନି । ଆରି ତମ୍‌କେ ଜିସୁକିରିସ୍‌ଟ ଦେକାରକା କର୍‌ବାକେ ସଙ୍ଗାଇଆତେ ।

^୨ ପରମେସର୍ ତମ୍‌କେ ଦୟା ଦେକାଅ, ତାର୍ ସାନ୍ତି ଆରି ଆଲାଦ୍ ତମ୍‌କେ ଜବର୍ ଅଇତେ ମିଲ ।

ବୁଲ୍ ସିକିଆ ଦେଉମନ୍

^୩ ଏ ମର୍ ଆଲାଦର୍ ମଇତର୍‌ମନ୍, ଆମେ ପାଇରଇବା ମୁକ୍ତିର୍ ବିସଇ ତମ୍‌କେ ଲେକ୍‌ବି ବଲି ମନ୍ କଲିନି ମିସା, ସତ୍ ବିସଇର୍‌ପାଇ ଚିଆ ଅଇବାକେ ତମ୍‌କେ ସାର୍‌ଦା କରାଇବି ବଲି ମନ୍‌କଲି । ତାର୍ ସୁକଲ୍ ଲକ୍‌ମନ୍‌ପାଇ ପରମେସର୍ ଏ ସତ୍ ସିକିଆ ଗଟେକ୍ ବେଲେ ସବୁଲକର୍‌ପାଇ ଦେଲାଆତେ । ^୪ କାଇକେବଇଲେ ବିସ୍‌ବାସି ବଲି କେତେକ୍ ନାଡାଇବା ଲକ୍ କେ ନାଜାନ୍‌ତେ ପୁରିଆଚତ୍ । ଏ ଲକ୍‌ମନ୍ ପାଇବା ଡଣ୍ଡ ଆଗର୍ କାଲେଅନି ସାସ୍‌ତରେ ଲେକାଅଇଆତେ । ଏ ଲକ୍‌ମନ୍ ପରମେସର୍‌ର୍ ଅଦିକାର୍ ନାମତ୍‌ନାଇ । ଆମର୍ ପରମେସର୍ ଦରମ୍‌ଟା ବଲି ଲକ୍‌ମନ୍ ଜେନ୍ତାର୍ ସେନ୍ତାର୍ ବେସିଆ କାମ୍ କଲେମିସା କାଇଟା ନର୍‌ସି ବଲି କଇଲାଇନି । ମାପୁରୁ ଜିସୁକିରିସ୍‌ଟେ ଆମର୍ ମାଲିକ୍ ବଲି ସେମନ୍ ନାମତ୍‌ନାଇ ।

^୫ ଏ ସବୁ ବିସଇ ତମେ ଜାନିରଇଲେ ମିସା ମାପୁରୁ ଇସ୍‌ରାଏଲର୍ ଲକ୍‌ମନ୍‌କେ ମିସର୍ ଦେସେଅନି ମୁକ୍‌ଲାଇକରି ଆନ୍‌ଲା ବିସଇ ତମ୍‌କେ ଏତାଇଦେବାକେ ମୁଇ ମନ୍ କଲିନି । ମାତର୍ ପତେ ଜେଡକି ଲକ୍ ବିସ୍‌ବାସ୍ କରତ୍‌ନାଇ, ସେମନ୍‌କେ ସବୁକେ କୁରୁପନାସ୍ କଲା । ^୬ ସେଡକିସେ ନର୍‌ସି ସେ ଦୁତ୍‌ମନ୍‌କେ ମିସା ଡଣ୍ଡ ଦେଇରଇଲା । ପରମେସର୍ ସେମନ୍‌କେ ଜେଡକି ଅଦିକାର୍

* ୧:୧ ୧:୧ ମାତିଉ ୧୩:୫୫; ମାର୍କ ୭:୩

ସରପି ଦେଇରଇଲା, ସେମନ୍ ତାର୍ତେଇଅନି ଅଦିକ୍ ନେଲା । ଆରି ତାକର୍ ଦେଇରଇବା ଜାଗା ଚାଡ଼ିଲା । ସେ ସେମନ୍‌କେ ବିଚାର୍ କରୁବା ଦିନ୍ ଜାକ, ଗଟେକ୍ ଆନ୍ଦାରର୍ ଜାଗା, କେ ବାଙ୍ଗାଲ ନାପାରଲା ପାରା, ସିକଲି ସଙ୍ଗ୍ ବାନ୍ଦିଆତେ ।^୭ ସଦମ୍ ଗମରା ଆରି ତାର୍ ଚାରିବେଟ୍ଟି ରଇବା ନଅର୍ମନର୍ ବିସଇ ଏତାଇଦେକା । ନ ଲିବ୍‌ବା ଜଇଟାନେ ଡଣ୍ଡ ଇସାବେ ସେମନ୍ ଜେଡ଼କି ଦୁକ୍ କସ୍‌ଟ ପାଇଲା, ସେଟା ସବୁଲକର୍‌ପାଇ ଗଟେକ୍ ଜାଗର୍‌ଡ଼ ଅଇରଇବା ବିସଇ । ସେମନ୍ ଅବ୍‌କା ପାଦରା ପାଦରି କାମ୍‌ସେ କରନ୍‌ନାଇ ମାତର୍ ମନସ୍ ମନସ୍ ବିଡ଼ରେ ମାଇଜି ମାଇଜି ବିଡ଼ରେ ବେସିଆ କାମ୍ କରତେ ରଇଲା ।

୮ ସେନ୍ତାରିସେ ଏ ଲକ୍‌ମନ୍ ନିଜେ ଦରସନ୍ ପାଇକରି ମିସା ପାଦରା ପାଦରି କାମ୍ କରି ନିଜର୍ ଗାଗଡ଼ ଅସୁକଲ୍ କଲାଜନି । ମାପୁରୁର୍ ଅଦିକାର୍ ସେମନ୍ ଗିନ୍ କରି ସରଗେ ରଇବାଟାମନ୍‌କେ ନିନ୍ଦା କଲାଜନି ।

୯ *ମୁକିଅ ଦୁଡ଼ ମିକାଏଲ୍ ମିସା ମସାର୍ ମଲା ଗାଗଡ଼ ନେଇକରି ତପ୍‌ବାକେ କାର୍ ଅଦିକାର୍ ଆତେ ବଲିକରି ସଇତାନର୍ ସଙ୍ଗ୍ ଦଦାପେଲା କର୍ତେରଇଲା । ସେଡ଼କିବେଲେ ପର୍ମେସରର୍ ଜାଗା ରଇ, ସଇତାନକେ ବିଚାର୍ କରୁବା ଅଦିକାର୍ ନେବାକେ ସେ ସାଆସ୍ କରେନାଇ । ତାର୍ ବାଦୁଲେ ମାପୁରୁ ତକେ ଡଣ୍ଡ ଦେଇସି ବଲି କଇଲା ।^{୧୦} ଏଲେମିସା ଏ ଲକ୍‌ମନ୍ ନ ବୁଜ୍‌ବା ବିସଇ ନେଇ ନିନ୍ଦା କାତା କଲାଜନି । ସେମନ୍ ଜେଡ଼କି ବିସଇ ବୁଜ୍‌ଲାଜନି, ସେଟା ସେମନ୍‌କେ ଅଦିକ୍ ବାବ୍‌ବାକେ ନ ପଡେ । ଜେନ୍ତାରି, କି ପସୁମନ୍ କାଇ ବିସଇ ନ ବାବଡ଼ । ଏ ସମାନ୍ ବିସଇ ଆକା ସେମନ୍‌କେ କୁରୁପ୍‌ନାସ୍ କରସି ।^{୧୧} ସେମନ୍ କେତେକ୍ ଡଣ୍ଡ ପାଇବା ଲକ୍ ସେମନ୍ କଇନର୍ ବାଟ୍ ଦାରଲା ଆତଡ଼ । ବିଲିଆମ୍ ପାପ୍ କଲାପାରା ସାରଦା ସଙ୍ଗ୍ ପାପ୍ କଲାଆତଡ଼ । କରା ବିରଦ୍ କଲାପାରା ସେମନ୍ ବିରଦ୍ କରି କୁରୁପ୍‌ନାସ୍ ଅଇବାଇ ।^{୧୨} ତମେ ଗଟେକ୍‌ତେଇ ରୁଣ୍ଡିକରି ମିସି କାଇଲାବେଲେ, ତମର୍ ସଙ୍ଗ୍ ସେମନ୍ ଲାଜ୍ ଲାଗ୍‌ବା କାମ୍ କଲେ ମିସା ସେମନ୍ ତମର୍ ମୁଆଟେ ଲାଜ୍ ନ ଅଇକରି ସାଆସ୍ ସଙ୍ଗ୍ କାଇଲାଜନି । ମେଣ୍ଟାମନ୍‌କେ ନ ଚାରାଇ

* ୧:୯ ୧:୯ ପଢ଼କାସିତ ୧୨:୭

ନିଜେ ଚାରାଇଅଛନ୍ତି ଗଉଡ଼ ପାରା ଅଛନ୍ତି । ପବନ ଆଇଲେ ଉଡ଼ାଇନେବା ପାନି ନ ମାରୁବା ବାଦଲପାରା ଏମନ୍ ଆଚଡ଼ । ପଲ୍ଲ ଦେବା ବେଲାଇ କାଇପଲ୍ଲ ନ ରଇବା ଗଡ଼ ଜେନ୍ତାରି ଉପାଡ଼ିକରି ସୁକୁବାକେ ଚାଡ଼ଲାପାରା, ସେନ୍ତାରି ଅଇ ସେମନ୍ ଆଚଡ଼ ।^{୧୩} ସେମନ୍ ସମ୍ବୁରୁର ଲଅଡ଼ି ଜେନ୍ତାରି ପେପୁଲ୍ଲ ବାରୁକରସି, ସେ ପେପୁଲ୍ଲପାରା ତାକର ଲାଜର ଚଲାଚଲ୍ଲତି ତିସସି । ଆକାସର କେତେକ୍ କେତେକ୍ ତାରାମନ୍ ଜେନ୍ତାରି ତାକର ପାଇ ରଇବା ଜାଗାଇ ନ କିନ୍ଦରିକରି ବିନ୍ଦବାଟେ ବୁଲ୍ଲତେରଇବାଇ, ସେମନ୍ ସମାନ୍ ସେନ୍ତାରିସେ । ପରମେସର୍ ସେମନ୍‌ରପାଇ ଗଟେକ୍ ବଡ଼ ଗଇରି ରଇବା ଆନ୍ଧାରର୍ ଜାଗା ସଙ୍ଗାଇଆଟେ । ଜନ୍ତାରି ସେମନ୍ ସବୁଦିନର୍ପାଇ ରଇବାଇ ।

^{୧୪} ଅନକର୍ ବିସଇ ବାବିଦେକା । ସେ ଆଦମରଟାନେ ଅନି ଆଇବା ସାଡ଼ ଲମର୍ ନାଡ଼ିଡ଼ିତି । ଏନ୍ତାରିଲକ୍‌ମନ୍‌ର ବିସଇନେଇ ସେ ବବିସଡ଼ବକ୍‌ତା ଏନ୍ତାରି କଇଲା, ଦେକା ମାପୁରୁ ତାର ଅଜାର୍ ଅଜାର୍ ସୁକୁଲ୍ଲ ଦୁଡ଼ମନ୍‌ର ସଙ୍ଗ୍ ଆଇସି ।^{୧୫} ସେ ସବୁଲକ୍‌କେ ବିଚାର କରସି । ଆରି ଜେଡ଼କି ଲକ୍‌ ତାକେ ନାମଡ଼ନାଇ, ସେମନ୍ ସବୁଲକ୍‌କେ ଦସି କରସି । ସେମନ୍ କରଇବା ସବୁ କାରାପ୍ କାମର୍ ଲାଗି ମିସା ଦସିଅଇବାଇ ।

^{୧୬} ଏ ଲକ୍‌ମନ୍ ମୁର୍ମୁରା ଅଇକରି ବିନ୍ ଲକ୍‌ମନ୍‌କେ ନିନ୍ଦା କରବାଇ । ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କରବାକେ ମନ୍ କରବାଇ, ନିଜର୍ ବିସଇନେଇ ବଡ଼ପନ୍ ଅଇବାଇ ଆରି ନିଜର୍ ଲାବ୍ ପାଇବାକେ ବିନ୍‌ଲକ୍‌କେ ନିକ କାତା କଇ ସୁଡ଼ରାଇବାଇ ।

ଜାଗରଡ଼ ରଇବାକେ ଆଦେସ୍

^{୧୭} ମାତର୍ ଏ ମର୍ ଆଲାଦର୍ ମଇତର୍‌ମନ୍, ଆମର୍ ମାପୁରୁ ଜିସୁ କିରିସ୍‌ଟର୍ ପେରିଡ଼ ସିସମନ୍ କାଇଟା ଅଇସି ବଲି କଇଲାଟା ତମର୍ ମନେ ରଅ ।^{୧୮} ☆“ସାରାସାରି ଦିନ୍ ମନ୍‌କେ ମାପୁରୁକେ କିଜାଇକରି ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କରବାକେ ମନ୍ କରବା ଲକ୍‌ମନ୍ ରଇବାଇ ।” ସେମନ୍ ତମକେ ଏନ୍ତାରି କଇରଇଲାଇ ।^{୧୯} ଏନ୍ତାରି ସେମନ୍ ଲକ୍‌ମନ୍‌କେ ବେଗ୍‌ଲାଇବାଇ, ନିଜର୍ କାରାପ୍ ମନ୍ କଲାଟା ପୁରାପୁରୁନ୍ କରବାକେ ମନ୍ କରବାଇ

☆ ୧:୧୮ ୧:୧୮ ୨ ଯୁ ପିତର ୩:୩

। ସେମନ୍ ସୁକଲ୍‌ଆଡ଼ମା ପାଅଡ଼ନାଇ । ୨୦ ମାତର୍ ତମେ ମର୍ ଆଲାଦର୍ ମଇତର୍‌ମନ୍, ଆମର୍ ବେସି ସୁକଲ୍ ରଇବା ବିସ୍‌ବାସେ ନିଜେ ଡାଟ୍ ଅଇତେରୁଆ । ସୁକଲ୍‌ଆଡ଼ମାଟ୍ ସାଇଜ ନେଇ ପାର୍‌ତନା କର୍‌ତେରୁଆ । ୨୧ ମାପୁରୁ ଜିସୁକିରିସ୍‌ଟ ବାଉଡି ଆଇବା ଦିନକେ ଜାଗ୍‌ତେରୁଆ ଆରି ପର୍‌ମେସର୍‌ର ଆଲାଦେ ବଡିଆସା । ସେନ୍ତାରିଆଲେ ତମେ ତାର୍‌ସଙ୍ଗ୍ କାଲ୍‌କାଲ୍ ଜୁଗ୍‌ଜୁଗ୍ ରଇସା । କାଇକେବଇଲେ ସେ ଆମ୍‌କେ ଦୟା ଦେକାଇଲା ଆଟେ ।

୨୨ ଦୁଇମନିଆ ଅଇବା ଲକ୍‌ମନ୍‌କେ ଦୟା ଦେକାଆ । ୨୩ କେବେ ନ ଲିବ୍‌ବା ଜଇଟାନେଅନି ଚାଡାଇକରି ସେମନ୍‌କେ ରକିଆ କରା । ଡରିକରି ପାପକର୍‌ବା ଲକ୍‌ମନ୍‌କେ ଦୟା ଦେକାଆ । ମାତର୍ ଡାକର୍ ପାପକାମେ ମୁର୍କି ରଇବା ବସ୍‌ତର୍ ମିସା ଗିନ୍ କରା ।

୨୪ ତମେ ଜେନ୍ତାରିକି ନ ଅଦର୍‌ତେ, ପର୍‌ମେସର୍ ତମ୍‌କେ ଦେକାରକା କର୍‌ସି । ସେ ଅଇଲାନି ମଇମା ପାଇବା ପର୍‌ମେସର୍ । କାଇ ଦସ୍ ନ ଦାରି ସାର୍‌ଦାସଙ୍ଗ୍ ତମ୍‌କେ ତାର୍ ମୁଆଟେ ଟିଆକରାଇବାକେ ତାର୍ ବପୁଆଟେ । ୨୫ ଆମର୍ ମାପୁରୁ ଜିସୁକିରିସ୍‌ଟର ଲାଗି ସେ ଗଟେକ୍ ସେ ପର୍‌ମେସର୍, ଜେ କି ଆମ୍‌କେ ରକିଆ କଲାଆଟେ । ସବୁ ଡାକ୍‌ପୁଟା, ମଇମା, ବପୁ ଆରି ସାସନ୍ କାଇଟା ନ ଅଇତେ ତାର୍‌ଟାସେ ରଇଲା, ଏବେ ତାର୍‌ଟାସେ ଆଟେ ଆରି କାଲ୍ କାଲ୍ ଜୁଗ୍ ଜୁଗ୍ ତାର୍‌ଟାସେ ରଇସି । ଆମେନ୍ !

ସତ୍ତ୍ୱିୟ ବାବ୍
The New Testament in the Desiya language of India:
ସତ୍ତ୍ୱିୟ ବାବ୍ (Bible)

copyright © 2020 The Word for the World International

Language: ଚେଡିଆ (Desiya)

Contributor: The Word for the World International

ସତ୍ତ୍ୱିୟ ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde